

四庫全書

集部

欽定四庫全書

集部

衡廬精舍藏稿

目錄  
卷一至三

詳校官監察御史

臣陳化龍

侍讀臣孫球覆勘

總校官編修

臣倉聖脈

校對官編修

臣朱依魯

謄錄監生

臣王瑾

衡廬精舍藏稿原序

先生之所謂策府也阿平無險四徹中繩寡草木而無  
鳥獸悉其所制作可掩古可昭來者舉而藏焉荆揚之  
間語無險而中繩者孰逾衡廬蓋神禹經之矣尚書惟  
揚州彭蠡既豬惟荊州荊及衡陽山海經載南海之內  
有衡山有三天子之都一名天子鄣即廬山也而禹各  
有藏衡之藏在岫嶺雲密嶽麓凡七十七字廬之藏在  
紫霄石室中百餘字不可辨董識所謂洪荒漾余乃攢

是已廬陵湊二山中北距廬東距衡俱不能千里予師胡  
正甫先生生於其間自號廬山名其居曰衡廬精舍先  
生少讀古人書長學於歐陽文莊羅文恭二公契餘姚  
之旨以上窺孔孟之際所著書若干卷其宗鄒魯其文  
洪範國雅其詩賦建安大厯脩胸中之誠以攄之書棄  
知棄意以明道而畧物閤而廬年六合斂而綜攝一貫  
鉅而敷陳皇王纖而歲縷醫筌靡不踰其元閭協厥六  
經子章自少從先生游得而卒業焉間請付之剞劂先

生曰非吾志也吾名吾書曰藏之衡廬耳子章曰有藏則有副以俟後世聖人君子乃謀之二三子而刻之嗟乎衡廬之藏兆自神禹文不盡解大都紀決排敘疆理至其見知堯舜為萬世文命之祖說在人心惟危道心惟微精一執中數語予觀先生所藏不禹之績而禹之心其教子章曰聖學始於仁而要在無欲語學至於無至矣克伐怨欲不行不得為仁有所恐懼憂患忿懣好樂則心不在有所未無不行未盡無而何以名仁孟子

論養心在寡欲養浩然之氣在無害故曰無適無莫君子也無意無必無固無我聖人也無聲無臭天也至於無則道心微而中執是乃所謂仁是先生藏稿之大都也楚周元公論聖學以一為要而直以無欲當一先生之教恍若券合而說者謂元公產於衡止於廬先生宅於廬締於衡其跡亦若片合豈二山之靈兆於禹嬰薄於元公而凝翕於先生耶嗟乎禹之學以柏翳光元公之學以洛陽衍今所為先生柏翳洛陽者屬之誰乎子

章不敏敬告吾黨諸君子相與共淬礪焉





欽定四庫全書

集部六

衡廬精舍藏稿目錄

別集類五

明

卷一

賦

卷二

古樂府

卷三

五言古詩

卷四

七言古詩

卷五

五言律詩

卷六

七言律詩

卷七

五言排律

五言絕句

七言絕句

卷八

序

卷九

序

卷十

序

卷十一

記

卷十二

記

卷十三

辯

卷十四

論

卷十五

議

說

卷十六

解

頌

贊

卷十七

策

卷十八

題跋

卷十九

書

卷二十

書

疏

卷二十一

碑

祭文

卷二十二

傳

墓表

卷二十三

行狀

卷二十四

行狀

卷二十五

墓誌銘

卷二十六

墓誌銘

卷二十七

雜著



卷二十八

雜著

卷二十九

雜著

卷三十

雜著

衡廬精舍續稿目錄

卷一

賦

詩

卷二

序

卷三

記

卷四

書

卷五

頌

贊

跋

卷六

行狀

卷七

祭文

卷八

墓誌銘

卷九

墓誌銘

卷十

墓表

壽藏志

卷十一

傳

臣等謹案衡廬精舍藏稿三十卷續稿十一  
卷明胡直撰直有胡子衡齊已著錄泰和人  
嘉靖丙辰進士官至福建按察使是集為其  
門人郭子章所刻凡賦一卷樂府一卷古近  
體詩五卷文十九卷雜著四卷又續集詩賦  
一卷文十卷不知何人所編卷首悼才賦下  
注少作二字殆其後人取初集簡汰之餘與

其晚年未刻之作裒為一帙也直家秦和東  
距衡山不千里北距廬山亦不千里故取二  
山之名名其書室因以名集直初從歐陽德  
游又從羅洪先游其學一以姚江為宗故所  
作胡于衡齊八卷大抵闡明心學然明儒學  
案稱其少駘宕好攻古文詞年二十六始講  
學故其文章頗雅健有格無抄撮語錄之習  
入其宗旨謂釋氏主於出世故其學止於明

心明心則雖照乎天地萬物而終歸於無有  
儒者主於經世故其學在於盡心盡心則能  
察乎天地而常處之有故其文章亦頗篤實  
近理未至王學末流之誕放至於雜著諸篇  
如設置獵人之類誠訶薄俗未免少傷忠厚  
考直初見歐陽德時德病其疾惡太嚴一切  
憤憤不平是已先失仁體殆亦其夙見未融  
故嬉笑怒罵不覺言之過歟乾隆四十五年

十月恭校上

總纂官臣紀昀臣陸錫熊臣孫士毅

總校官臣陸費墀



欽定四庫全書

衡廬精舍藏稿卷一

明 胡直 撰

賦

雙松賦

有序

去桃源六十里鄭家驛堂背雙松喬碩奇古閱人多  
矣予數過加瞻仰焉近年採巨材雙松以非杉楠幸  
完莊生所謂材不材之間驗矣予獨訝其不托深谷

而處孔道終非其所故為賦云

猗與雙松閱幾百齡豎雲漢以布葉掩日車而抽楨偉  
峻極之瓌質匪羣品之攸京矣結侶之太狹爰伉儷以  
居貞類海濱之二老媿魯國之兩生爾其違文陛謝上  
林逃岱嶽之封爵脫閔宮之斧斤抱貞陽之烈氣乃根  
托於置亭雖隱約於一舍終挺特於霄旻參日月以飛  
節貫四時而晶英欽為德之崔嵬虞處身之未諶背幽  
寥而弗都據闔闔而稱永撫孤操以嶢嶢匪藏珍而匿

景此之孰得孰失孰智孰愚予獨鬱伊而網緼將印言之弗恂請決策於詹尹

誚螢火賦

有序

予夏夜候月堂皇觀流螢下上飛明因感世儒小明不能窺乎大道遂為之賦用自警云

維朱明之煬蒸御空館而偃仰候明月以延竚覩夜色之沆漭聞熠燿以飛螢懸三五而下上突流星之的爍頽隙光而搖颺紛瓊葩以繁滋散蠓珠而輝晃抱孤明

以自照奮重陰而如塘或循涯以飄飄時出林而穿莽  
類明哲之篤保豈犇熱而蒙戕同飲露於寒蟬焉嘈嘈  
以競響長虞表乎忠貞安仁綴以殊獎予獨悲子之姦  
修曾未覩太陽之焜燿贊昊清以赫曦焜八荒而非廣  
偉大明之無外燦萬物之穰穰彼月星之霄出破闇昉  
於窮壤或隱翳于靈囿亦明德之中朗豈若子之耿耿  
終何裨乎參兩子且不能煒華燈於堂皇抑照乘而晶  
爽獨悄悄而涼涼恣違物而惚恍將矚子以大道寧辭

予之譙讓

感蒼蠅賦

有序

余暇閱室中有青蠅挂蛛網得脫者復鑽窗紙求出  
不得翊日幾斃因鑿竅出之感而為賦

眇茲一室牕楮玲瓏光生虛白案几昭融青衣羽客倏  
爾遊從三三兩兩營營翬翬于時有舍隅爾朱之宗家  
世網業手口並攻儀天象之懸畢類虞師之設罟有翼  
而來必絀其中既資夕膳復薦朝饗嗣覩一客蒼顛脩

容已繫復脫一奮殊功人曰是其族之傑雄也已乃欣  
一生於九死依容光以遂沖背魏闢兮弗趨鑽故紙兮  
求通雖縱掉於羅罽終悲咤於樊籠淹翼日以朽餒將  
枯死於櫺櫳爰有博德先生睠矣其恫鑿竅方寸導使  
由從復乃厲色聲而誨之曰爾蒼顛者能弗忘繫網之  
厄鑽楮之忤乎爾乃弗知一膜之表曠浩靡窮下何地  
而非衍上何天而弗窿子將翱翔兮汗漫逍遙兮混濛  
放身太虛飲露餐風笑尋芳之太汙眇附驥之非隆縱

鵬飛而九萬亦胡大於域中於是彼蒼者子俛首鞠躬  
聆言若怵一躍騰空弟子晉曰若非邁先生將朽此蟲  
矣先生儼然正襟愀然改容曰弟子識之彼世方以觸  
網為悅鑽楮為工不知幾千萬兮羗靡方以瘳其矇徒  
惆悵於目前抑胡樂以自功

志歸賦

余媯州之瑤裔兮胎初謀乎顓昌淑有周之錫茅兮卜  
鳳皇之鏘鏘中綿邈而幽寥兮延明德其幾千祀維先

大夫之黜修兮遵重華之遐軌代蹠鉤而儀矩兮重擷  
英于芬藝赤奮若之麗文明兮會壯月悟以蒞幼絳慕  
古之靈詰兮嘗夢寐而見之束奇服以為豫兮冠切雲  
而佩纖離罹元天之不弔兮浸綰髮而殞余怙身惇惇  
而繚悵兮抱淒惻而血為雨伏蓬衡之圭竇兮操瓢瓠  
以奉慈母雖領顙而瀕九死兮志不跌而山峙縱時命  
之長邈兮儕醜旅之為恥紛其咷此鶉結兮竊黼衣而  
自比登賢書于幾壯兮猶枵腹而突不燬幸至人之徂



邁兮指孔道于中天曰塗人為禹而不越塗兮啟跬步  
而覽羲軒子則繇周露而端履綦兮毋爾蹈歧劇之旁  
偏予趨風以雀躍兮塞惟溺博而驚言詮述道真之醇  
腴兮親時俗之漓言珍遷固之瓌瑋兮口尼軻而足延  
擘荆玉抵飛鵲兮曾不識重輕之所緣左予駟于眇伽  
兮亦罕為犁其城庭既仰祿于三茅兮紛多岐而戰此  
脩名時曖曖其強齡兮猶狐疑而因仍繆連袂而升南  
宮兮攀紫極以攸征宅爽鳩之卑仄兮鼓蟬翼而補青

是邁時路之蕪穢兮霽元雲而蓋夫皎明昇不遲而執  
衡兮泥強圉而奪要津赫乳虎之銜命憲兮糅砥玉之  
均焚黍鴟梟于家術兮斤鳳雛於雞鶩恣闔國之狂泉  
兮莽饕餐而酖醒六合瀕洞若顛舟兮乾坤幾頗而不  
平余茲悵飲涕兮射天狼之未能奮欲斬此長虹兮恨  
無倚天之斧斤後賈子千禩兮弔靈均于湘潭掇江蘅  
以充餓兮亦何裨乎時難撫祝融不足舒嘯兮酌洞庭  
而隘吾盼改吾幟于巫峽兮涉九折坂而停驂吾騰蹕

萬仞之岷峨兮摩金乾而撫兩丸睇北辰之在睫兮猶  
欲叫乎帝閭悵疾疾之遄摧兮緬白髮于高堂朝勃然  
含紱而東兮返翼軫之故疆脩三歲之邁軸兮旋迴節  
乎武昌焱徙旆于八桂兮又結軫乎禺陽惟予躬之鼎  
鬲兮世齟齬而卒莫當余安能賈晃暉于甌脫兮奏那  
頌乎揚阿之場方再請而返服兮足彳亍而吭弗張盼  
太階之燼燼兮思美人於西方仰華蓋之連座兮懷三  
台之煌煌鞭扶搖而清挈貳兮顧日月之自芒扣洪鑪

而排闥闔兮置非余之所臧巫咸既與余違兮又寡約  
介以相將老冉冉其彌晏兮塗漫漫其愈長邊馬虺隤  
而不進兮河鼓不可以服箱彼孔席之靡溫兮孟車數  
十乘而弗侈吾誠非修竈下兮亦奉教于君子余故陋  
曰萬宇吾一軀兮時夏吾一肢胡蘄絕而卷懷兮條與  
世而長辭魂一宿九繚兮疇弗惕乎明時已矣哉河清  
之難俟兮允闕志而節彌烏獸不可同羣兮指箕山而  
非期昔夫子欲浮海而遯九夷兮亦匪余心之所如思

九垓之博幅兮羌奚處而頓興赤將氏謁予而歎兮悲  
世故之嶮巇導予以天路兮啟予以玄珠曰真人之休  
逸兮豈怵怵乎濁穢餐元氣而躡金華兮馬需瓊田之  
粃穠駕虛無之為駟兮靡所如之弗豫王母來宴西維  
兮華公款于東汜嘯父翩其響琅璈兮玄女從風而迴  
集羽樂八景而入天門兮踐九宮之會宇叱豐隆移綵  
旄兮回祖洲以容與俯崑閬之下土兮曾不勝衆真之  
舄履極九天而至愉兮羣仙夫其咸娛超氛壒而托星

辰兮閱自古之多徒薊子元放詭莫追兮豈無成公之  
與魯女前史班班可鑑兮奚齟齬而稱誣抑西方之有  
聖兮夫不治而不亂彭錢非脩兮殤子非短彼恂往來  
天地之神精兮亦何鳧鶴之為續斷紹詹尹而龜筮兮  
夫惟子之邁也神龍變化亡弗可兮何必都此塊也予  
抗臂而莫然兮久揲著于宓義唯用行而舍藏兮有孔  
氏之遺懿宣中道之自虞廷兮乃天命之為皇指皞皞  
以為鵠兮撫蕩蕩以為床古盡性而至命兮又何擇于

遊藏余確乎不拔兮亦時止之為光崦嵫其飛曜兮  
曾不揮魯戈以再陽縱皓髮之蕭颯兮策十駕于途長  
苟朝聞而不偲兮夕則可而勿恨唯余之坦然居休兮  
亦何謝養空而翱翔晚發憤兮忘老又何必去乎不死  
之鄉薛曰返衡匡兮故遊偕二三子兮夷猶忻鳴鳥兮  
出谷浴沂水兮悠悠鼓一弦兮故琴樂吾天兮何求螺  
水洞乎洙泗孟山屹乎泰岑不下帶而佩宇宙兮豈必  
畧羣籍以從禽彼磻溪釣于非熊兮久矣非吾之攸珍

矧二家之斷斷兮浸若螺贏之與螟蛉

衡廬精舍藏稿卷一



欽定四庫全書

衡廬精舍藏稿卷二

明 胡直 撰

古樂府

劉生

劉生氣若虹身跨五花驄  
西京然諾重北關姓名雄  
結客三輔外揮蓋萬人中  
直遶河源地歸來第一功

紫騮馬

金史卷八十二  
卷二  
三花汗墮紅萬里自獮戎駟駿龍為友繽紛錦作幪獨  
乘元菟塞如馭大鵬風幸奉英雄駕狼居蚤勒功

隴頭水

隴水挂隴頭霜笳咽共幽那堪來去淚分作東西流飲  
馬寒仍渡磨刀夜未休直取樓蘭破東歸不顧侯

卞和獻玉退怨之歌庚子年作

桐栢水出荆山傍華精固結鬱以藏魑魍夜哭怖神芒  
穴山采之寶璞彰於以獻之楚兩王悲嗟嗟王胡不自

中聽信讒人乃有賤工一言詬之雙足離躬嗚呼歎歎  
心之痛兮口不能訶足之離兮無可奈何吾獨悲哉寶  
璞而題以凡石真士而誣以誑賊悠悠蒼天曷其有極  
投彼讒人乃明白黑嗚呼歎歎寶璞可剖以自見我思  
王兮勞心惻

明月篇

朝發兮采石暮蕩兮馬當散炎靄於輕颿流皓魄於船  
艎耀江波之鱗鱗噴萬里兮珠光矯玉螭兮璇宮舞素

娥兮霓裳渺下上兮混素浸無窮兮滢泱盪予目兮天  
外浮予躬兮銀潢彼湘纍與明妃邈不足以絃予腸予  
將騎白龍歌少皞挹南斗而酌酒漿又詎知鸞斯跼跼  
焉之控地大鵬矜羊角於蒼蒼

柘枝詞有引

余從京師初覩戎戲莫諳其節思必古柘枝之舞因  
作此詞寓有感焉

將軍長劍倚西極志欲滅戎方閭外屯營三十萬鉦鼓

震遐疆落日初挂崑崙側戰酣氣彌揚長鋌直擣河源  
外生縛吐谷王殺戎血作黃河水洗刀生赤鎧玉關從  
此無亭燧喜氣發春陽天子御門賜顏色雙賜小蠻娘  
金鈴扑轉呼萬歲萬載樂平康

步出上東門行

步出上東門回回起念思今日不作樂何復待來茲  
君家有清酒席上有琴鳴良遇心所歡可用解愁情  
舍下無斗粟囊中無半錢不肯學龍蛇自委蛇何不去

解一  
解二

而海上從彼辟穀仙

三解

騎當飛兔馬佩當步光劍男兒

墮地雄奇必有為何能坐愁唧唧悲此寒與賤

四解

枯魚過河泣

枯魚過洞庭延望波濤濶泣涕自漣沍感是舊棲托緘  
書報白龍慎哉勿輕躍風雲未有期懼為豫且獲所貴  
知德希翁淵詎可脫

銅雀臺

君王營四海西伐復東征頓棄三分業空餘八佾情舞

衣金薤葉歌調白楊聲妾恨非神女無由入夢傾

昭君怨

毳幕易墮房氎裘挂錦囊雪悲調粉白雲想換流黃未  
荷龍顏顧曾傳雞舌香得還故宮冷猶是沐恩光

薤露歌

步出北郭門遙望渭南里高墳倚石麟相對何累累借  
問何代人云是樗里子此人昔相秦自矜力與智拔蘭  
如發蒙傾蒲等噓蟻一朝號嚴君裂地銘金璽氣勢何

灼爚韓魏馬敢訾自知百歲後帝宮夾墓趾帝宮亦何  
存唯有荆與杞榮焰化飄風千秋若寸晷達人任元化  
龍蛇自逶迤得志成甘霖不得樂蓬累

燕歌行

寒風發發薄軒牕葭莢揭揭月蒼黃白露慘澹成清霜  
春風幾日秋氣剛蟋蟀鳴我床羲和叱馭何劬勩  
回顧華髮變蒼蒼耿耿不眠夜何長起步落葉循階廂  
鳴絃惻惻奏清商借問客思何瀟洋乃在燕山北斗傍



中有高樓五鳳皇紫貝雙闕白玉堂大明宮殿何煌煌  
上薄太清耀文昌噓喻六合控朔方西壓崑崙東扶桑  
有美一人御八荒羣公左右儼成行九陌朝天珮玉鏘  
我獨何為限河梁欲往從之無輕航金芝采采遠莫將  
朝侶雞鶩暮麋獐愛而不見心煩傷中心懷思不可忘  
跂聞鳴鴈南飛翔不覺涕泗滿巾裳側身北望倚彷徨  
山中桂樹徒自芳

緩歌行

北溟有魚不知幾千百里化為大鵬六月不飛培風鼓  
怒一徙天池驚斯區區掉舌譏之余容與於蒿下奚以  
之九萬里而南為鄙夫睢盱射雉爭高任公日入而不  
獲一朝而引戴山之鼇矯矯淮陰胯下相遭起佐沛公  
促項如蒿何怪神龍取笑蛆蝦未見海若秋潦莫誇人  
各有心好尚舛差惡用相加筵乎撞鐘蠡乎測海焉知  
多寡之門大小之家

當車以駕行

上有蒼草下有靈龜下有茯苓上有兔絲同聲相應同  
氣相資流水高山豈無子期火出陽燧水出方諸銅山  
未崩鐘聲四施龍興雲自蒸虎嘯風自馳生當逢堯與  
舜死不為商受鬼為我為彼仲尼之子何用苦栖栖聖  
人御天時幾在茲龍馬出河鳳鳥載下敢告僕夫星言  
風駕

折楊柳

思緒芳蕤密愁魂亂絮飄影隨粧鏡曉吹斷塞笳宵攀

折心先碎緘題意共遙到應憔悴甚憐是故時條

關山月

刁斗夜偏驚關山月正晴那堪元塞影遙共故園明冷  
浸剗犀劍光翻翼虎營愁聞笳吹起併是斷腸聲

公子行

翩翩佳公子愛客日忘疲置酒臨飛觀挂席扶桑枝交  
牕侍玉女賓蓋何歲蕤西園競紛葩灼灼映清池名香  
陳異域綺饌分天厨瑤觴傾桂醕鸞刀宰神魚燕姬

左調瑟越豔右吹竽畫窮成宵宴綃幔華燈舒陳阮恒  
接轂丁王曳長裾發篇凌白雪妙曲鳳將雛各罄萬年  
觴良遇惜居諸偉長何恬漠獨竄箕山隅

朱鷺

舞朱鷺鷺之榆考賁鼓吹笙竽八簋陳九醞宴嘉賓  
樂相於講周禮進典謨歌祈招詩騶虞采豳風顯白駒  
邁三五握靈符謚坤戶轉乾樞光天下踰海隅賓吁咈  
主都俞諫者出色愉愉于胥樂福祿俱萬斯載承權輿

雉子斑

雉子斑文章一何陸離性行何剛狷十步一啄百步一  
飲朝飛不過林夕息乃在野田穉麥間安能逃彼蘇合  
丸秦人張羅巧若素空爾非爰爰者兔何能超其藩雖  
有哀響詎聞九天象以齒自焚麝以香自殘鬼神好晦  
惡用太妍雉子何不剗爾繡裳卸爾朱冠遠從王子喬  
棲息緱氏山弋人長繳詎能攀

君馬黃

君馬黃臣馬驪與君論毛色臣馬馬能希臣馬雖微賤  
來自竈域生權奇朝刷流沙千萬里暮蹠燕昭臺下墀  
君若建翠華能使和鸞齊君若張大纛早能識路歧  
哺糞金非所宜臣馬當獻君願假九方知

艾如張

艾如張羅艾如張羅熠熠翠鳥投艾迷羅客語主人鳥  
質微眇又無善鳴雖負黛色徒悅宮庭爰有神禽雲霞  
其羽雄鳴六律雌鳴六呂黼衣繡裳僕隸如雨汝何不

以四海為羅羅此神禽豈無衆族來下來王汝莫鳥圖  
放鳥山堂主人熟視不忍釋奇毛神禽亦不家悲嗟嗟

善哉行六解

朱葩春榮黃葉秋翻逝者何迅一往無旋形不七尺命  
靡百年騰精宇宙營目九埏吉凶是非徽纒紛遷自匪  
仙道曷任燔煎丹經百卷妙藥一九松喬邈矣傳者妄  
焉彈箏酒歌對之中冑駟車穹蓋憂悲孔延不如澹素  
放心自然憶彼至人教我忘言



芳樹

芳樹結根乃在上林間吐朱華兮歲挺上有雲霞照耀  
華姿下有湛湛之清池君王羅綃幕霓旌翳瓊枝玉醴  
酬紛葩佳賓咸來茲觀者忘疲宴者以委蛇惟願我君  
王萬歲樂於斯芳樹同鄧林永老無離披

行路難

君不見烏生子坐巢秦氏桂樹端黃鵠摩天離哉翻二  
物紛紜遭射彈又不見嵇康遺榮志倕仝魏武鼎業期

千年一身四海俱難全人生以天地為鈞陰陽為陶吉  
凶禍福隨變遷秦項雖雷威那能奸其權放勲之帝仁  
如天胡為淳滴洪濤震蕩於九埏鯨鯢食人噴蛟涎自  
非金書蒼水使沐日浸月知幾年湯德及魚鳥四海成  
乾枯顏生抱瓢有餘樂弱齡白髮摧黃壚威鳳祥麟三  
千年一間覩鴟鵂獠獠無地無大者塊扎不可測何論  
魚目混靈珠切玉利鉛刀鹽車駕駟駘自昔孔孟已皆  
然何用怵迫生煩紆我今落魄若喪狗君亦胡為局促

如轅駒君乎何不為神龍之變化用則甘霖霈四國不  
用還歸包山湖愚子藏舟深山壑達者藏天下於天下  
放心與化而俱徂忠信可以蹈呂梁太行未必摧輶輻  
揚雄美新誠渙忍屈原沈湘何太荼柱下首陽無工拙  
方朔依隱翻自拘與君今日相逢且為樂會須一倒三  
百壺安能白首長睢盱聞君躡屩尋五嶽我當褰衣叩  
元幄太公老作帝王師磻水當年卧寥邈雲龍風虎自  
有期翱翔大道長蹕攀行矣山中路不難回首卞和羞

金史卷二  
獻璞

聖人出

聖人出黃星明天庭朗耀泰階清冠日月佩五雲駢駕  
飛龍揚霓旌恢帝網惠天心疎斥蠅蚩進龜麟濟六合  
奠八殛四靈咸集九夷賓流雅頌綿休禎億千萬禩地  
天寧

結客少年場行

赭汗溢金落驕驕若游龍手掣紅蓮劍腰插寶月弓左

彎連雙鵲右挽殪玄熊探丸渭橋北關雞平陵東作使  
秦羅敷調笑漢叔通走馬揖司隸停車接上公從者五  
陵豪雙控鐵花驄借問誰氏子云是古俠雄生小特魁  
烈長欲盡西戎然諾五嶽重意氣萬夫宗坐待掃欃槍  
寧數貳師功飛檄傳烽火照灼甘泉宮天子徵六郡姓  
字達宸聰裂眚閃巖電怒髮指蒼穹慷慨生赤霓叱咤  
起剛風排陣龍隊踴開營虎翼從飲馬瀚海黑搖毒霧天  
山紅既奪休屠祭復作狼居封轉戰闐顏破移兵昆莫

金史卷一百一十五  
卷二  
空震響播八區英聲蜚九重自非蓋世勛那辨許國忠  
凱歸報明主雄名勒景鐘

將進酒

將進酒開華堂主人敬客黼衣玄黃周旋虎步磬折龍  
翔寒溫各竟意氣恢張時哉惠風百卉菲芳旁唐為殷  
箏碼璫為周觥羅列水陸陳椒漿鳴鳥暫歇雲和倡八  
音肉好和者一何噲噲主人前致辭上客莫停觴人生  
燭閨若隙光聚散靡常君胡為乎對酒不御持髯吐氣

而慨慷為君屬之  
不醉不可歸  
房客跪謝主人  
人各有  
思腸結髮攬桑  
弧長大不得將  
沈吟日夜命各  
有當墨  
突孔車胡為皇  
皇幸當盛明之  
世朝野悅康夔  
龍滿清  
廟諫鼓在堂皇  
龜龍游沼鳳鳥  
輝煌靈芝歲三  
秀嘉禾  
獻四方才者宜  
征拙者宜退藏  
主人家殷富時  
吏不呵  
室家洋洋今我  
不樂焉能回戈  
於魯陽願言秉  
燭洗盞  
更湯人生貴適  
志何必綰金章  
鵬鷺匪大小鳬  
鶴何短  
長但願皇帝陛  
下聖壽無疆容  
請吸東海主為  
倒銀潢

攜手崑丘巔醉卧王母旁  
睨觀當時焉知名物之不為  
朽楊將進酒樂未央

古行路難

丁未冬頗有子雲悔少之嗟作此篇

郢人夸白雪後世珍其聲  
本非清廟韻徒為巴國傾  
不聞神人暢肅雝奏唐庭  
一鼓百獸舞再鼓鳳鳥鳴  
洋洋三鼓亂天地咸清寧  
噉彼惠施臺胡然悅晉平  
暴風墮廊瓦三年宜驚奔  
誰能為此曲欽哉古放勛



君子有所思行

黃茂信嘉穀焉用雜稂莠稂莠何足言蟲賊竟長畝所以九苞羽翺翔千仞霄豈與鸛雀輩爭路鳴嚶嚶我願裁錦字寄聲於清颺為我語神禽無然困山椒孤竹歸西伯尼父無停鑣軒皇本神聖阿閭當來巢但恐良媒隔寂寂誰相招

門有萬里客

門有萬里客鬚髭結冰霜入聞南土音訊知來故鄉果

得舊里間共井復同裳戒庖烹伏雌延客敘溫涼借問  
邦族間今昔幾存亡客起訴主人閭里非故常吳越盛  
兵戈征輸劇吾疆疇日富舊穀今者但空箱空箱仍水  
盜屋廬半荆荒辭端未即竟攬衣涕淋浪收涕且勸客  
強飲豁中腸

二

門有萬里客車馬儼成行問客何方去駕言返舊鄉主  
人挽客泣去思何劬勸早晚寧鄉井為予語高堂身雖

遊上國夢寐懷本疆出入承明廬恩光詎可揚我家南山下田園成久荒兄弟共親鄰幾載不同觴不如復里閭輸黍故山陽歲宴列林麓酌醴膾元魴尼父稱大聖詎知沮溺良臨歧莫重歎與君別非長君行慎夙夜強飯戒風霜

遠如期

有引

張伯端太史奉使而南也因覽樂府鼓吹曲有遠如期篇遂變其調犁為三章歌以贈之

我欲登閭風之層巔兮我欲登閭風之層巔兮盧敖充  
我使豐隆駕我軒經歴縣圃俯睇九埏手擎日月出入  
天闕灼灼靈華獻于帝前帝令三光風雨靡愆匪佳人  
兮誰為先

二

我欲凌滄海之漭泆兮我欲凌滄海之漭泆兮天吳為  
僕御蒼蚪服我箱東過王公西王母房員嶠雙闕六著  
相羊呼咤靈鼃堙殺波浪耀彼鯨鯢藝我稻梁匪佳人

分予誰望

三

夫何佳人之違此兮夫何佳人之違此兮照我靈珠貽  
我璫璵我何贈之采蘭及芷又何酌之桂英為醕瞻彼  
白鳩徒潔其羽翩翩神鳥不與予處停杯不言罷筇一  
語彈南風之琴奏清角之音我不如鼓龍胡擊土鼓河  
梁之區愛慎爾軀祝融之巔誰者容與瞻望弗及兮思  
如縷

臨高臺

臨高臺高臺上極于穹窿紫垣天市瑊闌綺疏曲曲而相通崑崙縣圃瞠乎其下詎知三觀之與祝融靈光章華豈足崇臺中之人丹顏素髮稱老翁從臺謁帝翔天宮帝親挈之神符斥飛廉而鞭豐隆回羲和之飛御日吼雨而掣風六合搖搖若顛舟臺亦岌岌不可以久從況乎下有滄瀾萬仞之洪淙滄桑變幻兮人莫之窮嗟爾非柱下之老龍又非廣成子講道於崆峒胡為凌蒼

吳駕汗漫將欲與天地乎長終

猛虎行

有序

予既有感作臨高臺然未盡也乃又作猛虎行以諗  
于龍德君子三致其意謹藏而不敢出

山下有龍山上有虎龍藏困穴虎卧天府虎非獨輝威  
亦有靈心口銜帝符命令百神虎踞地長咆大塊盪搖  
睥天短噓星辰紛拏虎雖羣矣有雛孔臄闕而八翼吐  
舌九州軒牙四極啗茲下土曷其有息嗚乎下土亟矣

無為語龍潛不辭齋無奮爾鱗遵養純熙乃登于天津  
我欲伐虎手無斧柯爾不潛深虎將噬爾如下土何  
如下土何

戰城南

有引

余邑朱貳守佐揚州倭寇臨城獨出鬪死作此傷之  
海水蕩山搖南斗天吳軒鬣回九首官家戈矛如雲攢  
蹲蹲不敢出城口大夫腰有赤文之寶刀生平欲伐北  
潭蛟一日不殺氣長吼寧當開門格鬪死那能跼蹐嬰



城守猘猢四面重圍列十蕩不前蛇矛絕欲移碣石填  
滄海滄海茫茫臣力竭城中砲鼓聲如雷不抹城南戰  
骨折天地為我慘澹壯士為我飲血義氣高橫狼島孤  
英魂暗作潮頭烈潮頭怒氣如山來人今戰死不復回  
人今戰死可奈何江東日夜愁洪波安得戈船將軍豪  
烈如大夫斬鯨盡種玉山禾戰城南君莫歌

出塞曲

月壯動邊聲良家七校營橫戈穿虎落絕幕取龍城騎

踏天山碎鞭搖瀚海傾不斷樓蘭頸韜中劍欲鳴

二

身將六將軍專征擊塞氛神兵動天地元甲起風雲戰  
奪休屠祭謀空邀濮羣平西報天子非取耀奇勲

衡廬精舍藏稿卷二

欽定四庫全書

衡廬精舍藏稿卷三

明 胡直 撰

五言古詩

雜詩

悲風響庭樹白露凝清霜躑躅不能寐怨此秋夜長攬  
衣三四起鳴鳥驚且翔屣履步前除明月鑒我裳明月  
忽西沈仰見心與房理瑟成商曲撫劍涕縱橫丈夫七

尺軀志欲攬八方雞鳴苦不早引領觀扶桑

二

捉衿不厭短曳履不辭穿所嗟白日馳當我盛壯年盛  
年不可再憂思起纏綿精衛何微眇銜石填滄淵大人  
志亨屯匪為識玉憐策我千里驥膏我文木軒朝遊漱  
渤澥暮宿層城巔

三

早欲巢衡霍匪為欣其上有金簡峯猶存神禹文又

欲歷泰山不辭路險艱日觀凌蒼蒼可以撫朝暎朝暎  
旋赫赫洗耀出咸池流光盪八表穹谷無不輝綿歷億  
萬禩玄雲無蔽虧人欲天不違胡為長盱眙

四

沈酒事詩書回回起憂嘆憂嘆何嗟及緬思古姬旦吐  
食意已殷執贄何繾綣山高不謝壤海深納漸漫漸漫  
既無遺何況江與漢千秋長已矣夢寐見顏面

五

漢家奕葉盛弼亮建豪英魏其一引疾武安揚嘉聲悲  
哉聲利子得氣何驕盈魏愛迫象緯曲旃羅前楹除吏  
傾人主襜褕入宮庭恨恨杯酒間兩賢一朝傾劉藥方  
染黃須臾變丹青對面揚洪波千載詎能平董生求仁  
義誰為欽其名

六

巢父傲帝堯季札輕其國胡為世俗人刀錐動顏色碎  
如羣狙公朝三不自得斯人之相遠何啻千與億不自

臨嵩少安能小陵丘蜥蜴舞行潦鼓舌譏潛虬彼此殊  
趨舍是非不相謀斗筭自營為馬用反謗尤

七

薄遊寫煩襟驅駕欲焉之朝登千仞岡延矚潁水湄潁  
水不可遊改馬莘野馳路逢一老叟秉耒適東菑我見  
問津途拱立於路岐頰首但耘薶鳴鳥相追隨却略再  
拜問適爾指中逵咄咄濁世子誰能測其微我馬何虺  
隤淚下不能追

八

總轡首北極反登玄冥州黑蜺舞我前  
檣杙嘯我後回車歷太行詰屈摧我輶  
輶摧馬已瘡痍羆貙向我留轉顧阻  
山河欲濟無輕舟九域不能騁不如  
事遠遊遠遊何所之飛駕凌崑丘  
眈眈若木枝遙觀青雲浮

九

崑丘不足步我欲廬太虛豐隆搖雲旂  
羲和駕日輿上仙鬱華翁偓佺弟子  
隅先過東父宅復息西母居西母



何嬾婉揖上上清居上清十二層歷歷見白榆鞭蚪從  
空舉倚鳥戲虛無縱覽六合表放心而夷與俯觀嶽與  
海何異杯與盂人生苦鬱紆無乃成蘧篲予將汗漫游  
與天同歡娛

十

幽幽山上蘭鬱鬱園中葵葵生欣有托零露滋黃蕤朝  
葩迎扶桑夕艷傾崦嵫幽蘭秘陰谷而無朝日晞山鬼  
日經踐荆棘相蔽虧二物殊顯晦貞心如一揆北風終

不痿嚴霜有餘姿豈若桃李輩一朝失所持志士存本性天命永為期

十一

騏驥行千里捕鼠不如狸太阿能割象不為膾臠資神龜遭網罟騰蛇殆即且松柏雲漢高乃復守門閭君子既大受馬用譏小知寄言匠石子棟楠有良宜

十二

至人握瑾瑜鶉結蔽瓏璅飛鳶矜腐鼠黃鵠豈相羨嗤

彼卞和氏荆玉求自銜三獻而不得憤恨起哀怨寧戚  
胡自悲挽衣不至骨唯有榮期子可為達士願

遊仙三首調笑丁戊山人

崑崙乘左馳日月從右沒人生居其間焱燭若行客榮  
華成朝電驕奢翻自聖生時斲一髮奄後肝膽隔秦項  
蕩飄風堯舜亦荒忽今古貌榮名枯骨何所獲我聞丁  
令威乘鶴獨超越千秋復歸來舉手謝舊國乃知好道  
人匪為托高潔

二

王子參白鹿游戲紫雲臺老君乘青牛西去還復回歷  
數躡宇宙神行遍九垓回觀商與周短世安在哉世儒  
阻聞見難為語其該不見棲真士遺世養丹胎日精足  
朝食朱芝亦間裁手把軒皇書不與洛誦偕抱一載營  
魄玄牝自閉開曰此山澤癯未果陟蓬萊寧知神內王  
孰與斃囂埃應龍未天飛羞比凡骨駘整駕吾將逝願  
言處不材

三

大道雖可受虛無為之先當其產大物噓噏成地天二  
儀既以剖靈氣於中旋壯哉廣成子出入握渾元一朝  
啟天局授道義與軒落落千歲間傳者有周聃周聃既  
隱矣靈均發其詮縱讀遠遊詞託意何濬淵寓言沈湘  
曲千秋徒憤悵寧知驂玉駟晞髮九陽門嵇生何倜儻  
結志纘沖元赭衣適東市顧日彈素絃兵解無驚怖俗  
士焉能原人生測有形焉得契空玄金石徒區區疇能

獲大還虞恐衆士笑為君陳篇端

詠懷

揮刀裁流水流水不可裁  
討古寫煩憂煩憂鬱以絃  
弱小事文翰結慕左馬場  
踰冠改初服馳精虞與黃  
卑彼雕蟲技欣此日月光  
長劍倚天外耿耿飛英芒  
大業無階陞盛年掩空房  
斂志仙真侶希心寥廓翔  
豈由心好道實乃意無疆  
羨門不我遇中路成悲傷  
整駕欲馬之沈思所行藏  
古有適志人鹿門與柴桑  
百爾非所珍耕

鑿庶自將晨往從之游寧憚歷冰霜

曹溪瞻六祖塔

朝策度平陀南華瞻縹緲谷斷意若冥崖飛神欲悄鑿  
山自何年重嵌出幽眇瞥見西天明引觀慧日晶山似  
耆闍尊溪即恒河淼借問何方隅祖宅神為表天路無  
術阡塵蹤失繳繞漱泉沁心脾聞梵徹昏曉禪榻托高  
眠寥然天下小

同張京兆九日遊茅山和韻二首

宿展華陽頌結慕靈山巔仰祿寄茲土引睇脰空延君  
侯京洛貴雅志雲霞鑄共歡九日期肇賞出郊埏遵流  
涉紆窈破莽躡斲砦側見青琳闕合杳丹霄懸矯然並  
躋登邈若翔飛烟迴覽隘八區放歌通九乾仙人喜我  
至玉沼沸神泉翻哉羣鳥呼寧非白鵲隨情澹吾喪我  
神超理忘筌坐得蘇門嘯詎論天祿元欣茲諧佳願矧  
復追高賢



三君起矣漢靈跡彌千年僕也欽元軌長揖問真詮抱  
一理則契何當授九還三君去已矣玉珮疇將宣安得  
九華女秘寶颯然傳孰是都不勤坐看飛羽翰福地倚  
惝恍丹竈撫留連微祿焉足縈人理難即捐未承慈母  
歡寧論婚嫁牽仰慚羅姑洞俯悵陶公泉連鑣出洞口  
相嗟且停軒歸還縛塵鞅轉復憶嶺岬何用理幽緒高  
吟雲藻篇

送同省王君歸覲建業

同居不知心白首成按劍何況江東西生小不相面于  
馬傾蓋初忻若宿所善奏我紫瓊琴贈我琅玕簞交歡  
苦未週颺忽起長歎明月蔽玄雲榆葉飄若霰涼風吹  
行轂回盼不得睽所欣南斗傍持節返鄉縣入門拜黃  
髮華屋羅芳宴持觴訴久離悲罷言笑晏兄弟各具觴  
南陔慰繾綣所願懷靡盬佳期遇能踐

送朱鎮山參政之河南二首

翳翳廣陌塵伶伶羈客蹤羈客多感恩欲語誰將通夫

子枉英盼傾倒愜素衷小言刺蟻蝨高論破鴻濛沃若  
飲瓊漿心愉顏貌豐云何疾乖違飛旆指洛東睠茲春  
陽穉玄陰蕩迴風廣望迷四野沈憂不可窮焉能雜林  
鳥奮翅起相從

二

夫子起南服弱齡富丘墳手醫青琅玕咳唾蘭芷芬翩  
其振苞羽照曜雲中君大音無慢響亮節凌埃氛以茲  
淹程路不自言苦辛曰予夙仰止匪但閭里親送之路

水涯屏營不忍分牽裾少延佇回盼帝城闐帝城一何  
麗軒蓋何繽紛皇路豈不廣良邁會有辰斗酒重致辭  
詎云兒女仁

同省魏張二君奉使二首鮑明遠體

與君繆通籍覲面縻心期擘挈金門游連翩公府趨詩  
書同流覽杯斚亦互持心知景光娛潛恐會晤移整駕  
居然迅銜命詎能遲鱗鱗起寒雲獵獵飄涼颼涼颼吹  
我心惄然遠懷思無由竟宿昔含悽奉別卮

二

出門渺何之所之吳與楚蕭瑟涼海隅靈靈長江嶼揚  
舲遵濟流挂帆連鴻舉悅懌遂旋思飛躍貪鄉者春園  
記故桑秋場歡新秬忻君使命嘉惻予歸思阻登車千  
里遙覽留庭戶語

贈別胡侍讀奉詔歸省二首

有引

予雅同宋大理丞望之張編修伯端胡侍讀子文談  
心論文間時一聚首焉今張史歸滯江陵宋丞方欲

乞歸侍讀且先行矣予情同三君獨爾羈留索居寡  
侶臨別慨然爰贈二首

松栢生挺直不為桑蔓牽磁石能引鐵於金終不連自  
余遊上京塊思寡懼顏良覲二三子談笑芬若蘭但言  
同聲氣寧知異鄉園爰作一巢鳥分飛忽別山宋丞懷  
五嶽張史滯江關矯矯吾宗兄何復理征驂征驂不得  
停悵隔增憂嘆豈無京洛客車馬羅翩翩親交念獨違  
心結不能言

二

魏魏太清間繁星燦以麗煌煌帝者居乃在棟隆具之  
子獄降英夙齡紬金匱茂脩篤文網達觀超名位名材  
為世珍寧與凡質儷總轡出東門匪伊江海思上有黃  
髮雙懷哉不得寐恭荷天子仁詔歸遑敢滯入門謝久  
濶下堂敕中饋長跪進霞觴頽光願有繫東公及西母  
延年樂萬禩豈不稱榮遇何以答明惠願言返明光皇  
風挹遠裔

別李伯承令弟得弟字

人生苦乖違無論兄及弟當此嚴風晨胡然生遠思輶  
車送城闌執手嘆迢遞借問嘆者誰齊國有二士一士  
良易知易知獲難棄譬彼雙靈鳥奇毛各有異一飛耀  
天衢一養凌霄翅會短苦別長何由判衣袂嗷嗷鴻鴈  
音聆之不能睇我為語阿伯神物終當婉願仲奮來儀  
雙鳴無終離

衡嶽感懷二首



弱齡慕遐舉中為世網嬰雖抱及物志而無濟時英家  
本衡廬交早負泉石盟秉憲涉湘沅吏道滋牽縈靈嶽  
奠疆域渺若隔蓬瀛恭承帝新命駕言事西征迴車恣  
探歷寥然夙心傾朝暉蕩雲嶽翊我游上清吾衰疲塵  
鞅人已馬所成卷懷慚伯玉遠遊謝尚平學道未有聞  
悵然迫心情安得同心友眷言事耦耕潛龍期晚得混  
耀入無名

二

恭聞夏后聖秉志切元元洪波蕩中土隱若裂肺肝不  
辭排決力寧論胼胝艱去家七八載三過不入門誠精  
格玄昊金書下層巒禹拜受此書治水識其端鞭撻蛟  
與螭疏鑿江與漢江漢故湯湯河淮無溢湍九州一以  
平四隩罄歡顏上啟重華帝巡狩駐瑤幡玄冕照林阿  
韶韻播江潭爰以上公秩望茲南維尊秩秩虞夏文郁  
郁夔龍班緬思此盛際千歲不可攀測知聖哲心匪恣  
一身安顧予道未至願言歸山樊山樊有故侶終焉攀

壤歡

觀日臺

肅此葵藿志候彼扶桑巔元氣闢混沌大明升重淵浮  
雲莫蔽虧赫曦以中天

會仙橋

石梁駕空壑飄飄凌風躋道遇古皇仙指我上天梯我  
揖謝仙人先後天在茲

戲作最潔詩口號

何物稱最潔予憐山下泉出石全無滓涵光自有漣無  
令許由至洗耳污清涓

何物稱最潔予憐岡上雪如鹽非火燔比玉無蠅涅無  
令樵父行踏破山前白

何物稱最潔予憐江上月散之有餘輝攬之不盈結能  
照一切物不染一切物

過匡廬阻雪不得登悵然增懷因賦短篇報九江

牧射陂朱君

危磴忽驚呼卷帷萬峯矗岩峽迴斗杓連亘橫地軸積  
雪石門高屯雲外相逐上有古仙人雙雙騎白鹿我欲  
造其廬饑餐瓊蕊馥塵鞅之凌風層冰阻迴轍神超無  
來往蹟隔成躑躅睠思故交親綰符在山麓形骸疲劬  
勦心神棲元穆長共僊人語入室披瑤匱薄暮吾當采  
相見叩元幄願言同斯人永結霞外輻五嶽儼巖岫遍  
綴青琳屋縱浪出方區何啻踐茲谷

登峨眉山至楚狂接輿隱處旁有玉液泉

羣峯屹中天迴巒閼芳谷流泉遞宮商隱約聞鳳曲楚  
狂去千秋高風表幽獨僕本黃虞徒雅志稷契躅繆負  
宇宙身豈甘泉石牯狂者亦何為諒哉非所淑彊年挂  
簪紱饑溺意頗篤宿疴疲縛節神襟躋繁牘根荄氣自  
劣枝葩艷空續時乎不再來天命詎終復困思漆開言  
暗與接輿觸往轍已無追來軒尚可贖決策希潛龍匪  
徒耽邁軸歸與貴自我親交難共告

九日遊仙女山懷有訓信卿是山為先祖謙謙府

君舊遊

仙女山居雲吾祖昔臨賞九日乘清飈挈客恣如往層  
嶂列重幃前川脩以朗殘椒猶可捫絕磴步難廣振袂  
森升霄翔身出穹壤生負丘壑姿矧復稅歸鞅以茲釋  
天刑焉用祛塵想但無王子晉吹簫雙偃仰引睇忽忘  
言孤月流歸舫

仲冬初三之日乘霽再遊仙女度螺塘江聞水聲  
冬暖似春暄晨度螺江水窈窕發清聲奔湍激石齒彷彿

佛松風翻凌空忽在邇漸遠變瑤瑟泠泠雜宮徵飛鳥  
適相從鳴音和交美聞此意歡然脈脈如有旨遊儵一  
何多相與偕行止思昔車馬間繁吹喧且侈孰若澹遊  
遨天機為吾使

冬日登仙女峯絕頂

曾聞商山境上有仙娥峯四皓邈已久千載慕遐蹤茲  
山名豈劣選勝將無同既疊青玉嶂豈乏紫芝叢餐芝  
恆所志安劉詎足功矧茲續遊遨素襟益以沖霽極冬



欲照葉落天彌空飄飄凌絕頂縱浪倚玄穹下山若有  
會把酒挹商風

春日近湖族叔枉過小酌螺塘江滸

卜遊非不早宿疴滯靈霖景霽散新暄和颺動神襟欣  
此竹林侶相送出江潯起矚原上樹早已貯清陰百卉  
競芳歲羣溜奏徽音乍言歲序易焱忽春已深欲攬青  
皇轡其如白髮侵不為人外遊恐負枝上禽遵渚發輕  
舸擊汰和清唼斗酒酌船艍對坐四山岑昔仕各鄉土

結托歡從今緬思慰同隱道真以相尋

陽能卿過宿孟山菴中

穉陽回淑景曠原汎初旭曾無車馬喧遲此求羊躅忽  
有素心人睠然慰幽獨及辰相遊遨結托同春服沖襟  
期邃古寧與塵氛逐疑義邀共析發篇時來續廣步並  
林塘聽禽出幽谷至樂超名跡世訾焉所局得君何脩  
然乘風共沂浴

歲月自駒隙皓髮忽以齊吾衰踰耳順君今五十期欲  
揮魯陽戈白日不肯移孔公美全歸川上嘆在斯念子  
服官年已謝趨時資眷言同丘壑世路焉足縻榮辱本  
忽區道真無等夷知命固翳如勉矣貴知非永願均切  
琢淇澳乃為歸

丙子杪秋驕陽蒸熱踰月不雨偶坐南軒承少保  
鎮山先生佳篇屢贈蹶然有感懷答三首

蒸暑隆三伏胡然劇杪秋驕陽乘時令無乃乖蓐收循

疇菽並萎臨池埃欲浮芳蘭摧通谷時菊零京丘靈雨  
不相濟田父空告愁舍置坐中軒已矣非吾憂發篋來  
瓊玖清風慰吾求


二

昔多君子朋乃在黃金臺卑彼聲利徒諧此金石懷予  
拙終畎畝學道無取材君本濟世英夙名播九垓中歲  
簡帝心竒勛列上台何當佐聖日乃復棄華階鴻冥分  
有托虬潛匪諒哉鵬鷄同一棲鳬鶴靡所乖永願陪清

唱不受俗塵猜

三

幾載殊燕粵尺書歲難陳今歸依南斗上下漳水濱漳  
水日悠悠客懷亦以新良覲未有期名篇睠獨殷伐木  
聲瓌瑋開選意清真所媿巴曲俚胡以賡陽春申章謝  
存慰報李詎能珍



衡廬精舍藏稿卷三

欽定四庫全書

集部

衡廬精舍藏稿卷

四至七

詳校官監察御史臣陳化龍

侍讀臣孫球覆勘

總校官編修臣倉聖脈

校對官編修臣朱依魯

謄錄監生臣王瑾

欽定四庫全書

衡廬精舍藏稿卷四

明 胡直 撰

七言古詩

金陵曲初唐體

金陵昔日盛繁華  
六代皇居接狹斜  
博望苑中珠委露  
太初宮內錦為霞  
花覆蒼龍填寶馬  
柳迷朱雀出金車  
九旂夜拂將軍第  
萬騎晨臨公主家  
主家甲第攢雲霧



粧樓舞館歌鐘度金屏翠幕競三條綺瑟銀箏通萬戶  
一姓公侯盡貂冠滿門子弟皆紈袴兩兩鳴珂金馬門  
雙雙飛蓋銅駝路金馬銅駝夾御溝帝在層城樂未休  
三千嬌女憑圖幸四十離宮判夜遊勾勾綺陌成宮市  
曲曲金塘起棹謳曾聞袁后承恩寵瞥見潘妃侍宴遊  
更道麗華髮似漆傾國傾城人第一結綺樓頭璧月新  
臨春閣上瓊枝密窈窕脩容夜掌箋婉嫕貴嬪晨簪筆  
可憐寵似日邊雲詎識人如花上日別有長干遊冶郎

鬪雞蹴踘虎鰲囊蜃珎象骨粧繁弱龍藻龜文轉步光  
俠氣飛談排許史雄風帶酒揖金張不辭萬醉青樓曲  
不惜千金紅粉粧紅粉爭矜桃李豔青樓直擬芙蓉殿  
真珠簾外柳藏鶯雲母牕前花覆燕燕飛燕舞不禁春  
鶯啼鶯怨晚愁人七寶流蘇開斗帳九華瑪瑙結羅裙  
嬌向舞腰生宛轉香從歌口出氤氲此時願作鴛鴦鳥  
此日願為連理身共道青山盤龍虎詎知白紵移歌舞  
一從五馬度長波幾見六龍更舊主陵夷宮闕成灰燼

飄零臺館生蒿蘭富貴驕奢能幾時王侯將相應同盡  
秋水盈盈秋鴈飛山川猶是人民非獨有石頭城上月  
曾照當時歌舞衣

憶昔行寄陳廷評南京初唐體

昔逐南宮士曾驅北路轅飛纓入帝里射策叫天闈天  
闈遼遼隔層穹以額叩闈不可通校書天祿人難擬獻  
賦蓬萊事已空黑貂毛落空奔走紫鉞彈歌割斗酒騎  
馬明朝謝北燕挂帆一夜歸南斗故人東海陳夫子作

宦南都法曹裏相逢相見重相憐  
一生一代一知己下馬即探千首賦  
開尊共論六家指半歲猶成轅下趨  
一朝遂作雲間駛當筵意氣拂雲端  
共道移山不讓難逸興旁凌鵲觀豪  
歌漫脫駿驕冠淹留五月菖蒲酒在  
苒良宵首荷盤才高官薄君無惜客  
久時侵我更歡憐君作牧鈴陽縣執  
法翻令相國羨寶劍空驚魑魅悲神  
蛟未際風雷變伯玉由來感遇多孔  
璋生小詞場擅滕王閣下別經年廷  
尉堂前重接面經年接面已多違可

憐歸棹復催歸花間恨別烏衣市月下含悽牛渚磯自  
予結髮操鉛槧欲參墳典凌周漢長歌直擬卿雲飛短  
賦嫌追白石爛古字陸離笑子雲竒篇勃律輕王粲寶  
璞翻干楚國誅韶音空使齊侯嘆側身天地有餘悲極  
目天門不可期九死不干楊意薦半生空負子期知東  
花纂纂今三載楊柳陰陰連歲改箇時綠綺向誰彈箇  
日春光空蘭茝借問上才遊西園何如高誼傾東海玉  
鯉傳書竊莫通金龜換酒誰為解金龜玉鯉兩悠悠采

石鍾山望欲浮竹箭江東長自好蒲梢天北幾時收  
朝定擬推承祚漢室俄看薦太丘長跪聊緘青鳥信  
何時並駕赤麟游

君莫悲行贈人初唐體

漢家天子重邊勲玉鉞登壇靜塵氛大將旌旄天外落  
健兒鉦鼓地中間三千劍客良家子八百材官太乙軍  
安排遁甲三方入開闔神兵五壘分霜重文犀六屬鎧  
血凝匕首七星文雙鸞明月能穿柳合隊流星似捲雲

大軍朝飲長城窟勇騎宵臨瀚海碣闕虎聲呼撼地天  
長鯨陣湧翻溟渤出塞初覘太白高踰河已射旄頭沒  
燄上先懸邀濮頭營中細截渾邪骨右地金人罷祭天  
左賢鐵騎空期月正直當年漢道昌坐看一日邊塵歇  
時來何用諳六韜天幸那須通九伐歸來天子賜龍駒  
綺閣雕甍隘九衢襁褓俱為左庶長盧兒盡是執金吾  
強弩將軍分食邑護軍校尉錫檐褕戶戶屏開金屈膝  
家家障擁錦屠蘇赫奕只知身尚主髭鉗誰識昔為奴

軒皇廟畧還真假圮老兵書定有無獨有當年李驃騎  
三出無功怨數奇南山射虎空穿石世事悠悠君莫悲

題羅巽溪太守所藏竹鶴老人山水圖歌

羅公宅  
地名西

岡

誰將崑丘縣圃之若木更取三山珠玕樹灑然揮斤造  
化工逸思翩翩落毫素葱蔥並帶蒼梧烟縹緲還連赤  
城霧樹裏茅堂挂雲端雲屏石几蒼苔寒上有砢砢疊  
嶂峯列之奇峯下有洄沿青錦湍居者不知幾千歲別



有乾坤日月寬百尺飛梁駕長壑凡夫欲度心骨酸豈  
同栗里誇田廬應共桃源製衣冠此中真意竟難辨世  
人枉作畫圖看羅大夫丰骨皎若行玉山俯觀簪紱如  
浮埃幾年賦就歸去來金高北斗懸難買開心懷獨向  
碧水青山生神解興超意遠凌九垓老仙憐汝心魂僻  
手摘羣山滿幅尺郊居座上有羅浮清卧時時游丹丘  
嵐光樹色淋漓濕浸入絢帙翠欲流夫君自此得玄悟  
宴坐齋心心無住何必禽慶與向平萬壑千巒疲道路

余亦愛山人覩此暢心神却借幽林色散入酒樽春醉  
來揮禿白雪毫為君添寫西岡月月光流滿千嶙峋

伐木篇贈謝樂昌鄧先生

有序

鄧先生名魯字重質鈍峯號也先生生質合道閉關  
杜機超然象外蓋古嚴君平孫登其流云戊申予館  
韶嶺侍先生將期磨德領誨飫若飲海顧予無篤遠  
之志弗能臻於道與懼負教督厚矣別後撰是篇寄  
謝先生并自警焉

深山伐木響丁丁春日遲明鳥嚶嚶沃渥肺肝涵浸心  
欣予得者古先生挈子躬兮遨太清滌煩襟兮葆元靈  
遺濁世兮返居真安得駕兮雙玉麟翩其西遊隱姓名

張玉屏京兆藏趙子昂所畫唐馬歌有序

張大夫藏趙子昂畫馬十六索予題詠予未知十六  
之數何取也客曰杜子美寓韋錄事宅詠曹將軍畫  
馬詩云其餘七匹亦殊絕迥若寒空動烟雪又云可  
憐九馬爭神駿顧視清高氣深穩以七合九此非十

六馬乎余未知果出是數否也聊援其意為之題焉  
唐家櫪馬皆雄才月精降作飛龍胎鳳臆麟形赤岸開  
不用余吾產寧須崑閬來自從太宗開創功絕世除兇  
雪恥酬千祀九夷賓天馬至馬者赤電三花明頡利紫  
鸞錦繡麗後來太僕馴養四十春乳成十萬六千之飛  
麟就中拳毛騶照夜白縱有江都不敢畫其餘七馬九  
馬總權奇傳真賴有將軍霸將軍去後豈無人祇能畫  
骨不畫魄子昂丹青近代雄身是龍孫異風格畫出七

馬若鷹揚秦皇七騎百不易次第九馬翹陸飛漢家九  
逸那堪策但看飲江嚙草相為娛澤邊隱見羣龍翹雙  
雙瞳鏡懸萬里淋淋汗血墮三珠意態搖撼昆明水勃  
若神蛟欲變波浪麤應知唐家全盛日乘此可以西擊  
胡子昂家有元德之的盧時不可分馬不徂神物空令  
落畫圖至今觀者生意氣志在白狼黃沙青海隅坐看  
一日乘風騰九區朝蹠流沙暮越都誰能羈絡同凡駒  
吁嗟馬乎古今識者凡幾徒前有九方聖後有張大夫

張君好龍好真龍一覩神駿恨晚逢  
驪黃牝牡未暇聞思欲薦之齊景公  
當今海內昇平久縱有追風縛畎畝  
近聞鐵騎飲長城域內求之千瓊玖  
願君引上紫玉坡金旛綵仗相經過  
能使六飛平不頗不然驤首矯足出  
交河為君橫行萬里盡沙陀歸來再  
圖凌煙績畫出雲螭照玉珂

使君行送別

使君動飛軒門填征馬喧蹀躞去何之  
持牘奏天關天

閣縹緲碧霄遠牛渚秋高蘆花短紛紛尊罍臺垣英何  
以贈君雙彤管共言君是秦中豪才名早共終南高佐  
邑只飲江東水感時欲釣海上鰲知君牢落情無極共  
傷賢士隱卑職莫因蓴鱸賦歸來且從省閣訪舊識不  
見老驥伏櫪思千里不聞烈士暮年心未已此去叩關  
訴九天此日江南命若蟻願天假臣七寶之龍淵水截  
蛟螭陸斫犀兕叱咤海若呼精衛盡填波浪平如砥坐  
看桑麻長作田然後拂衣謝天子謝天子難具陳見君

飛躍心浩渺送君寂寞意嶙峋儂莫歌吳歎君莫唱秦  
音吳歎慘愴不堪道秦音悲壯愁人心不如與君兩置  
之江頭脈脈且分襟

王母歌壽句曲王生母夫人

吾聞昔日西王母鞭鸞宴罷瑤池侶萼綠雙成夾寶幡  
人間天上恣遊處爾來八萬六千春二見桑田復為滷  
鍊丹曾度魏夫人閱世應同皇太姥前年猶餐鍾山玉  
去年移家華陽曲華陽羣仙爭獻壽大茅起舞小茅續



高堂鶴髮雲作裳芳筵沆瀣羞鸕鷀吁嗟母兮不羨簫  
歌擁芳筵還見珠樹勝當年珠樹花開豔五色長與蟠  
桃共薦璇臺側

送陳給舍之南省長短句

疇昔遊南國羣彥列嶙峋廓落諧心期夫君意最親看  
君意氣同仲舉掃除天下宿自許大兒詎肯揖元龍小  
兒孔璋那曾數胷中礪礪凌匡霍詞源彭蠡春波濶綽  
約曾遊姑射山清淨寧同天祿閣幾年名姓注天宮新

命南垣詔語崇聖明耳目重萬里况乃留都是故豐即  
看鳴玉辭金馬愁見征帆挂紫鴻挂帆一去大江落江  
外鯨鯢走郊郭腥風浩蕩簸五湖殺氣峻嶒湔大壑君  
今停杯投筯欲何為以額叩閤非爾時休將五餌掇時  
艱耐可三空獻帝堦送君行君莫悲僕也與君有夙期  
十五國風談未畢一曲雲和姑置之主人玉缸酒如乳  
相對那能不舉卮勸君臨歧且盡觴鳳臺牛首空相思

贈魏翁

先生閉簾諷道書七十朱顏鬢未疎曾共伯陽醉蒼液  
還同象罔索玄珠人間未肯留名字赤帝外臣無乃是  
七十二峯總遊遨八九雲夢吞無際更聞黃鶴復歸來  
幾迴飛跨洞庭水

春野吟

大皞應節條風回沖氣韶光遍九垓青雲霈澤素冰開  
燕嬌南徂鴻北來睠春陽之可樂兮嘉平疇之于耜桑  
藹藹以娛蠶麥芄芄而覆雉羣花艷而鶯繁碧藻繁而

魚麗偉佳人之獨抱飲醇和而並熙禎臯蘭以為佩綴  
江蘅以自嬉偕三五兮良儔登京岡兮夷猶舞惠風兮  
僊僊歌伐木兮悠悠循芳谷以邁軸撫流水而浮游汰  
梓澤之靡冶蕩牛山之沈愁將安排以齊化繫長繩於  
煦日縱予心於區外侶東皇之太一

台嶽短歌二首贈王少冶郎中守台州

鬱維台嶽刺天嵯嶢雲翳貝闕斗避元標金櫺複道高  
入神霄雙雙老公駕鹿駮颶度橋而下芝蓋飄颻迎使

君兮東來撫我曾孫兮逍遙

二

鬱維台嶽潛根十洲真人不殺海怪吞舟天吳軒鬣腥  
穢仙丘雙雙老公方瞳卷髮八百弟子吹竹鳴球迎使  
君兮東來殲彼毒蛟兮妖蚪

上壽詞奉壽宗母太夫人

奉母七寶玻瓈盞盛以赤瑛之琬盤蘭漿桂液浮朱丹  
中厨饌出玄豹肝紫駝赤兕間熊蹯河伯神魚鱗斑斑

左右侍列皆靡顏子夜歌聲綠雲端再拜獻壽為樂歡  
母不可兮安素澹有子食祿足時甘窮滋極欲非所耽  
猗與母德世鮮班願母千齡淳風還

二

奉母七綵芙蓉帳垂以靈珠玉旁唐碑礫倒挂青琳琅  
吳姬剪製九華裳上有朱鷺錯飛凰罽賓霧縠雲霞翔  
西方火浣綰明璫鷄舌五味鬱金香再拜獻壽為樂康  
母不可兮安素常六珈象服有輝光綺豔焜煌非所臧

倚與母德世鮮望願母千齡熾而昌

三

桂宮蘭寢侔天居璇臺并幹瞰八區朱爵文牕列綺疏  
丹穴藏金斗蠙珠方域阡陌皆膏腴曲池蘭榭紫玉樞  
八百僮奴履紆朱七十鴛鴦羅階除再拜獻壽為母娛  
母不可兮安敝廬有子已作殿廷儒家世仁義富倉庾  
倚與母德世鮮如願母千齡為令模

黎翰林維敬席上仙人騎白鹿圖歌

僕本三十六帝之外臣好遊汗漫騎赤麟當時小僊王  
子晉驂駕白鹿來相親朝蹠崑丘嘯閬苑暮過員嶠宿  
渤濱函關青牛那比跡洞庭黃鶴猶絕塵幾年誤落人  
間世悵憶僊踪不可置竭來黎君高堂午筵開見畫生  
綃宛相似復疑神車天上回頃覺風馬雲中駛金樓十  
二杳難期空向丹青起遙思吁嗟黎君生長羅浮之僊  
標駕鹿凌風度鐵橋笑揮百賦戲海若怒掃千詩擊山  
妖食苹已作周王客獻環身在軒轅朝明時金門稱大



隱暇日黃花喜見招把君之黃花倒君之卮酒羨君且  
從夢龍游與君終作麋鹿友雲間真侶有宿期畫上瓊  
山仍如舊年來蕉夢竟誰真醉後同歸無何有

祝融峯用韓韻

祝融插天天半起尊居擁護烟雲裏踏盡羣峯幾千尋  
不知猶是孤峯底隱若賢人望大聖賢猶可擬聖難名  
吁嗟遐哉聖所際高高上極于太清

欲遊方廣尋朱張舊蹟以積雨阻遂別衡嶽西去

作長短句

夜卧兜率宮朝返絡絲渡回瞻七十峯峯峯蔽雲霧忽  
然風捲重雲開紫蓋朱陵似相顧遙觀祝融隔層宮空  
憶昨日經行處今日非昨日人間異天路余本烟霞人  
塵網寧自錮金簡粗探虞夏文蓮花未躡朱張步游蹤  
苦被陰霾隔元關莫藉仙源度我聞峨嵋之山高入天  
上有靈仙不知數即今不復倚躊躇驅車且向西遊去  
重来擬結魏元君不似桃源迷去住

澄江秋水篇寄壽沔翁先生七袞見遠懷

澄江秋水淨如拭，龍洲萬樹森似織。主人別業深樹深，樓臺影落水中直。自從身謝五斗榮，一任鴻飛九天翼。灌園耐可狎鷗眠，洗硯還應供魚食。詞賦八百敵離騷，玄言五千凌道德。兒孫盡課雕龍文，家僮只收伐檀值。明月滿江江浸天，天為主人開眉臆。憶昔游從恣經過，江頭花底奈春何。香風庭際度蘭茝，帆影軒前送棹歌。竹靄厨烟色共碧，鶯聲童語音相訛。主人當日興絕倒，

一斗百篇不為多醉來共撫先生柳書罷還籠道士鶴  
管絃何必羨金谷觴詠真堪續永和主人早是丈人行  
從予結髮推宗匠共道談詩匡鼎來那知抱道羲皇上  
一別十年秋復秋萬里那由奉巾杖傳道今年七袞餘  
雙瞳似電神精王翻憐羈客錦江頭題詩招隱增惆悵  
嗟予何事老塵容舊約空悲五老峯猶思月色醉林亭  
遙想秋聲和夜鐘會須三江作釣侶還尋五嶽共遊蹤  
至日冒雪遊禾溪遲近湖族叔

歸來忽踰年兩得逢至日長病盼春歸漸衰驚歲疾朝  
來命車禾水頭撫景何辭竹林遊牽帷萬峯成燕婉俛  
仰已無千歲憂乃知此方山水奧况聞先代芳跡留同  
宗同隱世莫得世外招攜不可即日晏梅花漾溪流悵  
望冥鴻天外翼

賦得淡泉歌贈張君

里內張君生綽約雅抱似欲翔寥廓家學早傳張仲景  
前身應是孫思邈曾飲長桑上池水視脈還如睹三膜

投劑幾迴死轉生  
抆人何啻饑連渴  
不將蓬蘽異高門  
當關百喚百不諾  
吾衰歸卧衡廬交  
反關謝客門羅雀  
三逕荒蕪竹樹新  
惟君來往穿林薄  
借問張君何所嗜  
生愛清泉恬自樂  
神方不藉九轉丹  
淡盡凡情即仙藥

悲憤詞哭歐陽文朝

日日相見不厭多  
一朝不見愁奈何  
幾年不見君歸來  
就君歌君今忽往  
矣已而已而渺若  
江河一去不復來  
空有淚滂沱

二

日日相語不厭繁一朝不語心煩寃幾年不共語歸來  
就君歡君今忽往矣已而已而渺若雲山一去不復還  
空有淚潺湲

衡廬精舍藏稿卷四